

26. august 2014

UKA 2014/107

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Skolefordningen-ip ataani kaammattortinut atorfinnik pilersitsisoqarsinnaanera periarfissaanersoq - aningaasatigut kinguneqaatissat ilanngullugit - Naalakkersuisut UPA2015-imi saqqummiunneqartussamik misissuinissaamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Ruth Heilmann, Siumut)

Tunngavilersuut:

Atuarfinni atuartunut kaammattortit oqaloqateqartat pinngitsoorneqarsinnaannginnerat ukiuni kingullerni malunnarsigaluttuinnarnera maluginiarneqarluni assigiinngitsutigut saqqummiunneqartarpoq. Taamaattorli maannamut periarfissaq tamakkiisumik atorneqanngilaq sapaatip akunneranut akunnialuinnaat atugassatut tunniunneqartaramik taamaalillunilu siunertaq pitsaasoq killilerneqartarluni.

Aaqqissuussinermut nassuiaatit kiisalu suliassat imarisaannut nassuiaatit amigaatigineqarnerat atuarfinni ataasiakaaginnarni kaammattorteqarnerup iluatsittumik ingerlanneqarnenut pissutaavoq. Pisortat aningaasaliissutaat siunertarineqartut pitsaanerusunik inerneqartitsissappata, iliuusissat pilersaarutitik pitsaanerusunik siunertaqarluartunillu suliaqartariaqarpugut. Meeqqat atuarfiisa ataasiakkaat kaammattorteqarnermut oqaaseqarneri kiisalu tusagassiorfitsigut saqqummiunneqartut tunngavigalugit, atuarfinni kaammattorteqarnerup siunertani naapertorlugu inerisaqqinnissaata aaqqissuunnissaa pissusissamisuusaaq.

Meeqqat ikorfartorneqartariaqartut amerlanerit kaammattorteqassappata periutsit timimut tarnimullu samminerusut pisariaqartinneqarat qularutissaanngilaq. Meeqqat atuarfiata meeqqat inuusuttullu ikorfartorneqartariaqartut kaammattorsinnaanarunikkut sulisorineqartut ilinniartitseqqinnikkut piginaanngorsarnissaat pissusissamisuusaaq, taakkulu suliainnut tulluarsakkamik pikkorissarnissamik neqeroorfigineqarnissaat piumasaqaatini minnerpaasariaqarpoq.

Kaammattortit psykologi-mi ilinniarsimasunut taarsiinnaannginnerat taarsiisussaannnginnerallu matumani erseqqissassallugu pingaaruteqarpoq. Kaammattortit sulisut atuartut ataasiakkaat immikkut ilinniarsimasunik ikorneqarnissamik pisariaqartitsinerat oqaloqatigiinnermi nalilerpagu, atuartut ataasiakkaat siunnersorneqarnissaannut innersuussisinnaanissamut periarfissaqarnissaat isumagineqarsinnaavoq.

Suliniuteqarnermi oqariartuutip siuarsarnissaanut tunngatillugu malitassianik erseqqissunik peqarnissaq kiisalu suliniuteqarnermi pitsaasumik sulisorisanut politik-eqarnissaq pisariaqarpoq.

Akunnerilli suliffiusartut killeqarpallaarnerat - ilaatigut ullormut nalunaaquttap akunneri marluk - pissutigalugu, meeqqanut inuusuttunullu kaammattorteqarnermik aqqissuussinermi suliniarnerup siunertarineqartut sunniuteqarnersoq nalilissallugu ajornakusoorsinnaavoq. Kaammattorteqarnermik suliniarnerup sunniutaasa, ilaqutariit immaqa iluaqutigisinnaasaraluat, ikiorneqajaanginnermi akornuserneqarsinnaaneq kialluunniit iluaqutigisinnaangilaa, taamaammallu tamanna piaartumik aqqiissuteqarfigisariaqarparput.

Atuarfinni kaammattorteqarnek suliniummi siunertarineqartut malillugit iluaqutaannginnera atuariit pisortaasa oqaatigisarpaat. Kaammattorteqartisinermik aqqissuussineq pimoorussamik pilersaaruserneqartariaqarpoq, taamaalilluni sulisut piffissallu suliffiusussat pisariaqartitsernermut naapertuuttunngorlugit.

Ajornartorsiutip pimoorussamik iliuseqarfiginissaa pingaaruteqarpoq, meeqqammi inuusuttullu piffissaagallartillugu pisariaqartumik ikiorserneqartariaqarmata, taamaalillutik ukioqatimisut minnerunngitsumillu innuttaaqatimisut inuiaqatigiinni nalinginnaasumik inooqataalersinnaaqqullugit.

Siunnersuutip aningaasatigut allaffissornikkullu pisortanut kinguneqaatissai

Misissuineq allaffissornikkut aningaasartuutaanissaa naatsorsuutigineqarpoq, tamanna ukiup affaanik sulinermik naleqassaaq (250.000 kr. missaani). Konto pingaarnermiit **30.14.29 Pinaveersaartitsineq** aningaasartuutissatut missingersuutaareersuniit misissuinissamut aningaasiiloqarsinnaavoq, siunertamut saniatigut aningaasaliinissaq pisariaqartinneqassappat.

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Soqanngilaq.

Siunnersuutip innuttaasunut allaffissornikkut aningaasatigullu kinguneqaatissai

Soqanngilaq.